

國

朝

詩

鐸

國朝詩鐸卷六

錢塘張應昌仲甫選輯

田家

田家翁

王尊美

丁男入縣晚未歸老翁自掩溪邊扉風急月落霜滿屋
敲石取火飯黃犢布衾不補冷如鐵病骨天陰痛欲折
甕頭有酒不敢嘗來春換米輸官倉

牧童謠

施閏章

上田下田傍山谷三年播種一年熟老牛亂後生黃犢
版築將營結茅屋催科令急畏租吏室中賣盡牛亦棄

今年逋租還有牛明歲田荒愁不愁前山吹笳後擊鼓
殺牛饗士如磔麟牛兮牛兮適何土

田家苦

方中發

渚蒲芽青山杏紅家家曉起催農功隴上驅牛西復東
犁頭偏剝春冰中火耕水耨各盡力櫛風沐雨不遑食
四月栽禾時已亟貸粟豪門甘倍息火雲燒天日如虎
暴背耘苗汗成雨朝來乾圻禾下土踏踏水車兼婦女
祈神幾度盼西成腰鎌穫刈歡秋晴低田苦淫高苦涸
實賴實粟徒虛名築場納稼先田主新逋宿負爭償取
碌碡聲傳穀已空終年竟爲誰辛苦賣牛夜對妻孥泣

看看乞食離鄉邑常平倉穀年年入農夫餓死無顆粒

田家

郭九會

田父夜徬徨生計摧中腸雞鳴呼婦子好與若商量佃
田不數畝分水只一塘作時嫌力少成時無剩糧既積
公私逋復憂水旱荒何以償宿負何以充蓋藏曾聆老
農言勤儉不可忘吾與若母子努力以相將婦聞長歎
息神沮意激昂蓬頭跣雙足不作閨中妝日中把耒犁
日晡挑糞筐小兒無氣力騎牛牧草場草色綠如玉牛
背穩如牀大兒兼樵采乾蒲與枯桑婦於風雨日完補
破衣裳田翁更饕餮耕耘時刻忙不惜汗成粒所痛肉

醫瘡力作敢云苦鞭扑難禁當

農民苦

李光地

四民最苦是農家食無兼設衣無華遇歉已傷熟亦病
坐視大賈居贏邪不受公廩佃富室場登早已來分瓜
天行十八無盈數私租豈肯毫釐差朝廷時有蠲優詔
農錢多不上官衙或逢繇役富者免追胥仍向農家撾
初春指畝貸升斗桀強收息數倍賒年豐未足填責負
此離荒歲又何嗟衝炎冒雨敢辭避但恐乾溢及桑麻
聖朝寬恤無虛載訓辭深厚漢文加歎息作甘人長苦
殷勤示儉國無奢噫嘻農業爲國本聖祚應與姬

歷選

田家行

陸隴其

誰云田家苦田家亦可娛上年雖遭水禾黍多荒蕪今年小麥熟婦子儘足哺所懼欠官錢目下便當輸昨夜府檄下兵餉尙未敷里長驚相告少緩自速辜不怕長吏庭鞭撻傷肌膚但恐上官怒謂我縣令懦傷膚猶且可令懦當改圖陽春變霜雪爾悔不遲乎急往富家問倍息猶勝無田中青青麥已是他人租聞說朝廷上方問民苦茶貢賦有常經誰敢咨且吁不願議蠲免但願緩追呼。

田婦行

李麒光

臨淮道上逢田婦赤腳蓬頭立高土卻指斜陽向客言
淮西風物由來苦地疏水濶瘠且荒昔年曾此生眞王
千里蕭蕭禾稻少平原脉脉多高粱富家問僮兼問婢
貧家耕作尋常事大婦前行中婦隨少婦紅顏能荷耜
夜習機杼晝習田茅簷籬戶朔風穿聽來蟲鳥知晴雨
舉室蒼茫出看天三更催起裳衣倒四更盥沐雞鳴早
五更挈伴走中逵天明始到田頭好阿翁復向坑前呼
兜粟移薪又刈芻黃口啞啞啼土榻竹筐瓦缶相攜扶
阡陌高低互淩躐壯者躑躅弱蹙蹙鎌鋤在腰兒在背

面面汗流仍背淡。削徧桑麻更摘瓜。白楊高栗啼悲鴉。
大風颭颭黃塵滾。肌膚寸寸積泥沙。酷日當天烈如火。
尺布蒙頭衣肘裸。渴掬河流飲樹邊。饑食麥飯田塍坐。
生來憔悴長荒村。低頭倩視臂間痕。一身耕織劬勞併。
滋味長年齧菜根。爲言辛苦猶不足。食無餘粒衣無幅。
頽牆敗草壓牀頭。夜雨秋風頻痛哭。吁嗟乎人生百歲。
曾幾日。鬢毛空向秋霜白。面鰲指皴味涼暄。環堵殘年。
夜啼泣。生平不識脂粉香。好花不戴真可惜。爲語珠樓。
金屋人。田婦何曾少顏色。

老農

尤侗

披衣過東郊倚杖問秋穀荒草滿溝涂老農相對哭二
月響春雷三月霖春霖四月荷鋤來小雨如珠玉五月
旱既甚蘊隆至三伏萬里曠無雲赤日燒茅屋青苗元
以黃滄海變爲陸我耕數畝田三年無私蓄朝憐婦子
啼暮畏吏人促今年又苦飢且恐速我獄爲我與天言
何故欺笑獨徒空野人家豈減縣官粟吾謂若毋聲何
不食糜肉公卿不撫脾有司不蒿目一夫田幾何磬磬
愁容蹙秦楚多大兵盜賊空城宿白骨半邱墟何處問
種穆餓死事極小苟安心亦足誰將雲漢詩補入流民
續

山農詞

金德嘉

萌堂四壁不蔽雨蠶箔蜂房走田鼠新婦銅釵換米炊
縣隸苦喚飯熟遲往年人客留我屋人有盤餐馬有粟
今年客至坐雞栖不聞雞哺聞兒啼阿翁有家不得住
身帶桁楊縣西去

典衣詞

前人

二月南榮日杲杲農夫牽牛踏春草春暖又當畝稅期
主伯亞旅齊典衣坐市列肆多錢賈估值公然書爛朽
氈包席裏纔一金跼蹐不敢近官府冶就白金官無答
吏手低昂安得之徼天之靈十報六長跪請待麥子熟

詔問循良下虎符。報最昨言苛政無。吁嗟我生獨不淑。
舊稅還將新婦鬻。田家鬻婦亦不傷。可憐嫁去無衣裳。

麥粥歎

又

麥秋積雨麥欲落。田婦腰鑣隴頭斲。小兒口涎餅餌香。
越陌手弄菜花黃。縣吏催租縣帖下到門。指麾秣官馬。
不惜傾筐飽饕餮。近前但怕馬蹄齧。內顧宿舂無斗糧。
款客何以上高堂。縣門昨有發倉事。安得荒村拜官賜。
縣隸拍手笑。且呼爾乃何人。問官儲飢民口數。夜書紙。
城門旦開去如矢。依倉雀鼠常苦飢。倉吏前月歸休矣。
田婦仰天行踟躕。櫪下顆粒還可搦。且斧濕薪炊麥粥。

歲晚古詩

金張

討租顆粒無幼女願准折賤良義不可轉賣尤謬絕誰
能如我家混混分別打罵業既除飢寒念頗切免租
竟起田愧與爾永訣兩年算大無我累不待說轉念有
田耕行乞力尙竭是人已乞食度歲若我換佃人何以供餉
反側不成眠賣田吾計決

田家行

藍啓蘖

飯牛畊東菑雞鳴星皎皎春風二三月播種起常早四
月長新苗五月鋤青草汗涇心如焚烈日何皦皦高田
常苦旱低田常苦潦溽暑六月至炎蒸滋煩惱冉冉黑

雲馳閃閃雷電繞
冒雨不得閒
勞勞通水道
七月涼風生
寒蟬鳴樹杪
八月鴻雁來
除芒獲新稻
霜露侵肌膚
九月桑麻槁
四時歷艱辛
所望西成好
登場穀穗多
兒女得以飽
穀多苦價少
官租何時了
札札弄機杼
夜夜織到曉。

踏車曲

趙俞

杉櫓作筒檀作軸
烏鴉銜尾聲轆轤赤
露兩肘腹無粥
踏車辛苦歌如哭
前年非底泉脉枯
去年甌窰長蒙盧
旱年掘窩轉水入
潦年築隄翻水出水入
水出車欲裂
農夫那不筋骨折
無奈今年又苦旱
塘水少於衣上汗

往年車完人盡力今年車破人無食人無食不足恤努力踏車聲太息伍伯催租秋賦迫連年未報災傷冊

田主歎

查嗣璫

龍山屈兩海東北窪下西南高高田既荒低亦旱田主佃戶同嗷嗷官司行文惜佃戶更下飛符責田主田主不荒佃戶荒私租莫徵徵官糧買糧上倉苦不足佃借官威翻貸粟時上官出示禁取私租復令田主貸恤佃戶况聞賑粥檄捐租那得賣田來買穀明年未必是豐年家家賣田誰買田

憫農詩

查慎行

豳風本王業稼穡知艱難立政務明農化理自古然我

從田間來疾苦粗能言請陳東南事約略得其端初冬
下菽麥深溝及春前根株載培護益使土力堅麥黃未
及秋晚蠶又催眠祈晴三四月雨水翻連綿針水分稻
秧襪襖行耕田時方仰膏雨杲杲恒當天炎威一熏灼
泥淖同熬煎委身沸湯中辛苦少所便好風槐柳下欲
往不暫閒老稚皆靡寧枯槁遠吸川或防霧損花又恐
蟲傷根半年隴畝畔力竭心亦殫如此冀西成食報理
或存但令畝一鍾歲事幸告竣私租入富室公稅輸縣
官所餘已無幾未足償勤拳况逢水旱加往往多顛連
逃亡等無地芻牧肯見憐高位有仁人垂聽宜惻焉所

以古大臣農事恒惓惓流移進圖繪咨傲陳風愆有時
亟施賑詔旨輒擅專有時撫瘡痍逋賦請緩蠲不上封
禪書不獻羽獵篇乾坤生生機君相操微權一念苟憫
恤惠風自遐宣矧今天子聖綏邦必豐年

邊農歎

方正班

南人食香稻邊民食燕麥燕麥復不多稊稗充朝夕年
年五月耕作遲即有冷雨來扎之

北方呼電
爲冷雨

迎秋更畏

霜與霰處處災祲采謠諺今年郡邑慶西成家有餘糧
換正絹有絹可織糧可舂又恐市上豪猾難相容

田父行

方朝

節候歲不同。栽植殊早晏。窪田常苦潦。高田常苦旱。穀
性各有宜。操作在方寸。田家有經營。老農歷聞見。荷鋤
五十年。不知華髮變。策杖詔諸孫。力田幸無倦。

力田豈無營。條桑亦勞止。歲功冬甫畢。方春復耒耜。役
役百年中。辛勤何時已。稍喜風日和。青苗將可恃。日暮
息種作。行行過鄉里。相逢漁樵人。一杯醉西市。

西市酒有餘。東臬期竭力。慚愧號老農。向人歎無食。雞
聲催曙星。男耕婦操織。秋風伐社鼓。豚蹄思賽德。築場
桑樹邊。兒曹皆起色。豐歲豈可常。方穫心轉惕。

拆車行

陸晨

六月不雨至七月七月不雨河水竭農人無計拆車歸
車拆人歸農望絕憶昔排車爲插秧烏鴉銜尾尾水忙
老翁稚女悉更代六十日不離車場岸高車豎水莫繼
更設一車灘下遞兩車併力晝復夜淺淺谿流何以濟
須臾谿涸車且停外塘之水猶盈盈全家輾輓搬車出
塘邊引水山谿行連日狂風撲沙岍官塘水捲行舟斷
欲搬無水可奈何只得停車义手看吁嗟乎今日不雨
望明朝朝來依舊青天高青天高苗已焦拆車歸來哭
號咷從今八口空嗷嗷可憐種苗苗不熟田中盡是心
頭肉

刈麥行

李天甄

偶攜游屐來郊垌麥畦高下鋪黃雲
三三兩兩婦子集腰鎌運臂工無停
滯穗遺秉委狼藉前村困載等山積
笑我雖無負郭田對此閒愁頓消釋
忽有老翁前致詞君居城市來何之
請君小憩與君語田閒疾苦君安知
去年秋旱禾苗枯石田奧草成荒蕪
樹皮石粉供一飽官租未了猶追呼
入村黑夜將人縛腳踏公門如病瘡
飢火腸迴轉轆轤鼓吹肉部驚鼓扑
歸謀諸婦淚潛潛昔日醫瘡術已艱
此時更覓心頭肉止有中丁五尺男
癡男索飯牆東哭賣去商人作奴僕
白鏹入手完條糧

官耗加三老四六幸免催征夜打門尙容枵腹度朝昏
今幸天公動憐憫一畦麪足餅餌馨刈麥登場恐化蛾
廩收倉貯苦無多宿逋已去三之一又值新征北限過
老翁刺刺語不住欲起被褐再申訴催租健吏忽登門
手持黑索繫翁去

麥蠶歌

吳屯侯

二月結冰三月霜只今四月麥未黃稚子久飢不能待
摘歸顚顚香盈筐砂盆煖焙青牛破一家欣欣齊上磨
撮來掌上如新蠶入口不減春飴甘近時重食不重衣
一襦難貿并粟歸縱有春蠶似蟻繭如斗不如麥蠶能

救貧人飢吁嗟乎。無蠶只愁富人恥。若無麥蠶貧人死。

插秧歌

上程
觀察

顧成志

木棉歲歲雨傷鈴。上下岡身作稻塍。夜看參星占水旱。
夏來甲子喜天晴。燕子巢成蠶子老。秧鍼簇簇青如草。
幾時芒種試開書。鴉軋車聲夜連曉。農夫養秧官養民。
第一先教潤澤均。壠欲根深扶欲直。暗滋根莠及時耘。
一耘再耘日鹿鹿。婦子嗷嗷望禾熟。卻到禾收意轉愁。
前年糶盡今年穀。

田家雜謠

五首

沈澗

賽田社

春雨秧苗鉞秋雨禾垂耳社公占得陰晴權春秋禱賽
剗羊豕里正朝來徧掠錢錦棚高矗神祠前傀儡裝成
演歌舞爭邀親串開華筵詎知閨婦賣釵釧祇博當場
一酣醺春田龜坼秋稻空社公神靈君不見

舉田債

布穀屋簷喚早耕農夫驚起多歎聲餅儲無粟誰負耒
征稅煎迫難逃生商賈握錢列市肆舉債償息什加四
且救眼前貪入手半供縣官半胥吏耕場磷磷稻芒垂
共道年豐慰宿期那知穫罷未入屋已被商家催納速

輸官倉

官倉周圍編作號按戶配厥輸正耗縣帖昨日火急催
納足官倉送運漕農家惜米計升黼倉吏踐踏成糞土
但祈收貯不作難吞聲敢訴三時苦漕艘銜尾供京儲
達官飽食府中居莫言粗糲難充飭都是農民膏血餘
償租限

公家催徵有程期立冬之後雪寒時私家收租亦開限
健僕如虎恣鞭笞初限全完寬升斗二限繼納免愆咎
三限乍過健僕來全家催蕩驚雞狗有女卷髮兒扶牀
牽出鬻賣不得藏官糧尙寬私糧酷那能天眼燭茅屋

稍桑葉

昂價預
貸爲稍

吳農育蠶惟論筐一眠二眠仰食桑稍得豪家葉百箇
吳地葉不論朝夕采飼免徬徨眼看蠕蠕競上簇繭少
勉惟稱幾箇同功聲撲撲婦姑抽縷費輓轡一堆霜雪照羅縠貨與
船商給直低償他稍葉尙不足君不見臨時購葉走趨
趕有人養卻空聲去頭蠶俗以空手有蠶爲空頭蠶

刈麥行

沈德潛

前年麥田三尺水去年麥田半枯死今年二麥俱有秋
高下黃雲遍千里磨鎌霍霍割上場婦子打曬田家忙
紛紛落磴白於雪瓦甌時聞餅餌香老農食罷吞聲哭
三年乍見今年熟

種田戶

李化楠

種田戶業良苦叱犢扶犁耕瘠土春忙力盡幾支柱又
屈驕陽少膏雨艱難幸得值有年那得倉箱盈萬千京
羔酌醴招鄰里解囊糶穀輸官錢官錢不欠儂心樂免
教催科受敲扑那知世情多變態正供雖完官事在東
家犯罪我爲隣西家爭訟我中人爲中爲隣累無已差
傳票喚何能嗔一到官署遲未理門前守候動經旬官
坐高衙方飲醇司閹如虎寤堪親一腔憤懣向誰訴不
敢言兮焉敢怒旅店晨昏度淒涼回首田園春色暮春
深未得勤耕作眼見蒿萊田卒汚又况訟師胸有矛頃

刻海市與蜃樓清白良民受冤枉籤拿械繫陷法網安
得賢侯視我如赤子事事入人心曲裏聽爾言爾勿哀
我亦身自力田來固知不翦稂莠良苗災

打麥詞

畢沅

荒村小姑髮垂額手把竹枷聲拍拍云是今年苦雨多
收得區區幾斗麥昨日割麥今日打麥催科在門飢不
及食大姑回頭語小姑縣吏下來酒緡無汝飢汝餓汝
勿呼阿耶責逋骨髓枯

催租行

尤鈞

浮塵飛滿村前後殷殷降降徹昏晝磨礮糠秕比戶喧

餘得斗升歡已透誰歟一棹來江干鮮衣耀日帶大冠
頤指頗學貴人態場前兀坐稱長官老農懼伏不敢語
小僕從旁相爾汝今年租米早入倉莫教縲絏無逃處
老農聞之意倉皇悉索捆載恐不遑手腳凍皴皮肉死
粒米視作明珠量量後翻教更呈樣不爾風前更篩颺
吞聲飲泣悄無言空船飄蕩隨風浪隨風浪去苦不前
未知此租還幾年側聞貴官已籍沒來歲輸作官家田

踏車曲

顧 豫

朝踏車夜踏車三日八口食一瓜老農呼天兒呼爹誰
人知我踏車苦含涕朝來告田主田主宿醒苦未醒

睡風牕呼不響

朝踏車夜踏車
輓轡水畔聲
啞農夫踏車
飢欲死紅粟
官倉飽蒼鼠
年年積穀爲
民飢民飢得
不告官司官
司無言吏胥
怒無錢不上
飢民簿

吳中田家歎

庚午年

趙曾

吳中田賦一何重
云是天庾充正貢
可憐胼胝三時勞
租稅纔完室已空
今年雨暘喜歲收
江南處處歌有秋
川楚估船今又到
田家飢餒何須憂
縣倉已開價不起
官家要錢不要米
二斗賣得一斗錢
吳中依舊無豐年

種春田謠

語溪風俗先春二日之夜邑民於縣衙外犁土爲田插秧次曉鄉農聚觀以形

勢高下行列疎密卜
歲豐歉名曰種春田

龔理身

農夫望歲先望春鳴鑼打鼓迎芒神先期禱雪仰蒼昊
到日撒穀填郊闌語溪風俗此則異占歲全憑縣前地
春前兩日夜之分共挈新秧荷農器暫將官道犁作田
曲者有陌直者阡手把良苗走且插頃刻遂徧東西偏
曙色朦朧日初上四鄉觀者紛攘攘彼觀占高原此觀
占下壤高原下壤勢易成未必家家盡豐穰種春田卜
秋禾所穫不齊可柰何我爲爾民一指說穫稼不如穫
福多但令歲歲值賢宰先秋早聽豐年歌

田家詞

陳廷桂

前年旱草根樹皮存者罕去年疫遺骸多於道旁石今年豐黃雲千畝吹香風秋蟬催人穫早稻腰鎌已具人力少以錢雇人須及早東家西家同薦先哭聲直上千雲煙死亡已盡逢豐年官租既完宿逋脫女嫁男婚室家作此時纔有生人樂但願無事驚長官吏不到門雞犬安萬一苟活無飢寒

刈麥行

石鈞

遠風泠泠天宇廓麥熟平疇事刈穫腰鎌日暮負麥歸
饑鳥依人樹間落歸來倚戶自太息去秋田荒常乏食
向人稱貸過殘年許到春收倍還直今朝麥在打麥場

明日麥在豪家倉，淒然無語淚垂臆。獨抱麥柴歸破牆。

刈麥詞

吳智

靡草死，小麥熟。腰鎌刈得畝幾斛。種時借米償不足，老婦倚牆翁仰屋。吁嗟麥熟我空腹，夫婦相將啜麩粥。

晨雞行

應文若

雌雷不鳴，雄雷鳴。炎帝日日驅火輪，金鴉雙翅騰赤雲。大田小田飛蓬塵，山火烈，河水熱。晝夜枯槁聲不絕，田間一粒粟，農夫心頭一塊肉。無肉一身痛，無粟一家災。君不見開府堂前夜，舉觴傳花四座迎新涼。迎新涼，樂未央。雞聲喔喔殘月黃，開衙打鼓行朝香。

踏塘車

方薰

去年踏塘車田中赤裂飛黃沙今年踏塘車田中泥濘
多魚蝦去年一旱三五月今年風雨橫交加踏車一日
雨落一尺水深轉車足無力雨不止車不休眼中淚車
上流子鬻去妻難留妻難留道旁哭來日何人共車軸

老翁賣牛行

袁承福

老翁賣牛手持餅持餅食牛抱牛頸念牛力作多年功
洒淚別牛心不忍今年有牛無田耕明年有田無牛耕
今年牛賤人皆賣明年牛貴人皆爭此牛賣去田難種
恨不與牛同死生洪水滔滔四字逼人兮牛兮雨無食

勸翁努力活荒年賣兒賣女尤堪惜回首視牛牛眼紅
吐餅不食心戀翁買牛人自鞭牛去老翁淚溼東西路

插秧女

陳文述

朝見插秧女暮見插秧女雨淋不知寒日炙不知暑兩
足如鳧鷖終日在煙渚種秧一畝寬插秧十畝許水淺
愁秧枯水深怕秧腐高田已打麥下田還種黍四月又
五月更盼分龍雨襁褓置道旁有兒不暇乳始信盤中
殮粒粒皆辛苦

牧牛歌

胡敬

秧針刺水波瀾瀾牧事春郊煙雨裏短衣遮髀來攏

叱叱驅牛聲不已大牛前行角雙摘小牛後隨拳短尾
陰紅絡頭軛斜倚力盡鋤犁汗霑髀哇東西走不計里
憊臥荒塍鞭不起牛兮辛苦無我冒欲鞭不鞭主人意
區區芻秣報已多主人責牛心太苛。

犁田行

吳存楷

秧田青青麥田黃初日下照田夫忙驅牛入田聲叱叱
鐵犁壓脊牛毛光春泥濘塉苦堅硬犁深入土三尺強
欲前不能卻不敢向人作喘走且僵老翁揮鞭與牛語
牛乎牛乎力須努爾不見農家四月催插秧以膝倒行
齊著上痛深腰蹠不得息時有毒蟲齧雙股又不見稻

田六月水如湯赤足踏車日當午背炙驕陽皮盡焦手
搨泥漿汗成雨耕農力作自年年扶犁豈獨爾牛苦秋
成敢望積穀收但求租稅完官府

踏車

前人

水聲活活車聲鴉鴉去年踏車稻揚花今年踏車纔放
芽秧一寸水一尺引水入車爭點滴盡是農人眼中血
莫嫌踏車苦莫笑栽秧急有水有秧大快活深林幾處
挂空車塘底泥乾車不得東家水少西家多分車奪水
相詆訶田中秋死不暇顧牒訴到官官奈何手把枯苗
泣歸路朱票下鄉期敢誤鞋腳費多須早償打門縣役

催錢怒聞却水車無用處明朝賣向隣村去。

踏車歎

陳均

溪水清田水濁腰挂橫轅足轉軸婦子唱歌聲似哭去
年雨少枯我苗平疇俱作龜文焦今年雨多水過腰小
麥爛盡蝌蚪跳雨少踏水入雨多踏水出雨脛青苔背
赤日朝餐未食飢欲踣長官宴客張水嬉管絃響過行
雲飛清歌頗厭秧歌惡一舸垂楊深處移。

襄陽
吟躬耕樂勉農夫也

周凱

聲聲布穀催東作桃花李花滿邨落勸耕一路吹豳籥
願爾年年稼多穫天有旱與潦爾但謹溝壑地有瘠與

肥爾但勤錢鋪

襄陽地多沙磧少塘堰之蓄水旱聽之於天

昨日輸官糧今

日糶新穀花豬美村酒熟兒童放學笑驅犢五風十雨
歲不惡堯舜在上樂耕鑿隆中之人甘淡泊

插秧詞

劉 珊

雨足雨足樹頂白波高於屋雨止雨止泥壓秧苗扶不
起天公倒水亦大好玉女盃翻惜太早山農歡喜澤農
泣往年肩入今肩出隄高一尺水拍隄風捲河波轉內
濫湖田有秧無處栽秧船載滿城中來市上攤錢論觔
賣青蔥顛倒場邊堆東家老婦西家請晝夜催犁無半
頃男婦持鎌水沒腰半刈麥蘗半插苗漉泥誤把魚蝦

撈似閩南山雷起蛟城中之秧爛如草且復限牛牛不飽縣官濡筆報雨風。一銓夜別三易稿。

看青謠

前人

市猾招搖三五輩徒手博塞錢神退去作鄉里看青人
分據團焦各樹隊左手提斛右擔筐稻麥菽苡憑我驟
汝收十斛我則三預指舛畦防銓刈不然嘯聚羣乞兒
寸草尺莖悉捆載鄰媼出爲排糾紛添多減少乃安寐
但欠升斗必取盈回頭更拔一稜菜可憐終歲竭胼胝
除納官糧種猶貸半爲鯨鯢谿壑填里胥蹠躩來作態
青衣大袖冠飄纓村犬尾搖不敢吠例索時豐今當增

嚙口何能倉猝對里胥市猾互爪牙盡力爬搜肌骨碎
市猾斂金壽里胥大酒肥羊託神賽噫嘻社有鼠城有
狐鉤尾薨足飮民軀安得鐵疾藜擗殺此輩殲其渠。

踏車曲

蔣炯

遮日蘆蓬低似屋蓬下杉車聲輾輾以人運車車運輻
一輻上起一輻伏輻輻翻水如瀉玉大車二丈四小車
一丈六小以手運大以足足心車柱兩相逐左足纔過
右足續踏久渾如在平陸高田低田足灌沃不惜車勞
人力盡但願秋成穫嘉穀上供國稅下卒歲舉家賴爾
水龍福

水車謠

陳裴之

踏水車踏水車車水忙煞鄉農家年年車水夏初畢今年車水秋未歇官河日淺幾寸餘博得農田土微溼土微溼日正高高田苗槁低田焦朝車暮車苦不足礮土炎蒸圻龜腹忍飢往叩田主人爲言車水多苦辛窮家婦子乏長力數縉催得農家隣欲向主人貸工本主人睨之發微哂昨聞官長嚴催科免漕告災應不準加七加八未可知我家食指尤難支爾曹貸得工本去催租他日休教遲上訴主人聽儂說儂本鄉民敢虛飾但願收成過十分半納官倉半私室縱然凍餒過殘年也得

全家聚蓬華。訴言未了雙淚垂。雪涕懷錢遽辭出水車。
斷齒須亟修車水。人工待炊食。

田車謠

王嘉福

朝踏車暮踏車。輓轡銜尾翻烏鴉。繞疇接畝聲呶呶。自
從五月天不雨。大河小河斷魚罟。中田日見稻秧焦。疲
盡耕牛人力苦。驕陽炙背火雲熱。手足胼胝筋骨折。農
夫滴淚不成泉。河水乾於眼中血。踏車辛苦辛莫論。歸
磨陳麥充饑殮。荒單欲報無錢買。早晚催租吏打門。

晚秋田家詠

黃燮清

穫稻

西風八九月積地秋雲黃刈穫須及時慮爲雨雪傷曉
鑣動殘月晚擔歸斜陽農家終歲勞至此頗稍償勤苦
守恒業始有數月糧嗟彼豪華子素餐饜膏粱安坐廢
手足嗜欲毒其腸豈知民力艱顆米皆琳琅園居知風
月野店知星霜君看穫稻時粒粒脂膏香

礪穀

檐際噪乾鵲晚來天氣清穀燥已可礪場圃及新晴蟄
龍未出穴野曠殷雷鳴輪推落月轉梁動飛塵輕篝火
照昏壁人影圍寒更野叟驗稻色老眼殊分明輸租必
嘉種勿與官吏爭粗糲雖不飽少食亦養生

踏車謠

屈爲章

商飆欲起稻初花桑柘陰中笠影斜
田家作苦無休息到處晚涼喚踏車
朝出長庚星未沒暮歸皓月峰頭出
東家有錢買犢耕灌畦千頃坐驅叱
西家健婦常苦辛隨夫赤腳翻車輪
人力安得如牛力日望禾頭長太息

瀏陽水車歌

周傳

瀏陽水車風作輪綠江旋轉盤空雲
輪盤團團徑三丈水聲都在風輪上
瀏水日夜西北流高岍低坵開深溝
輪盤引水入溝去分送高田種禾黍
盤盤自轉不用人年年祇用修車輪
我聞江南厚水用人力赤足踏車聲

轉急夫妻子女同一車雨淋日炙色作赭我車較彼分
逸勞引來不怕田塍高一家之車溉十家十家不憚勤
修車但使車輪長在軸不愁秋來禾不熟

農夫歎

楊炳

日如火火織初張避猶可日如湯炙熱之勢不可當夫
踏桔槔婦推穉穉稚子雨三指孖叱咤四體勤劬汗如
雨下雨不來汗難代汗一點血一塊一寸禾一寸血血
枯一人死禾枯一家絕君不見招風統扇吹團欒雛姬
環侍羅冰盤水亭五月不勝寒

農夫歎

徐堂

入冬五十日而無十日晴田家未刈穫場地禾縱橫風
傷兼蟲食所得無餘贏况茲騎月雨檐滴無停聲濕薪
不受火新穀芽重萌耕耘力春夏忍飢望秋成豈知秋
成日不救饑腸鳴江南財賦地漕輓輸帝京行看催
租吏叫囂雞犬驚昔爲稱貸家今亦爲窮氓錢錢不易
得張衡詩錢何難得安能免笞撈有魚聚寒碧有鳥翔太清于
天獨何辜淚向田間傾

村農歎

錢泰吉

前年禿媛生去年商羊舞今年幸有秋催租一何怒小
兒向母啼狀若畏猛虎東隣租早完報賽擊土鼓西隣

賂里胥負租亦安堵而我何以償身上無完縷輸將困
敲撈賤與犬羊伍吁嗟農納租王政無苛取奈何樂歲
農反不如商賈村農爲我言淚下紛如雨三年一歲豐
那補兩年苦

戽水謠

閩媛毛秀惠

綠楊深沈塘水淺轆轤車聲滿疆畝倒挽河流上隴飛
渴烏銜尾迴環轉今夏旱久農心勞西風刮地黃塵高
原田迸裂龜兆圻引水灌之如沃焦男婦足繭更流血
鞭牛日夜牛蹄脫田中黃秧料難活村村盡呼力已竭

蠶耕謠

陸瞻雲

耕耘苦農夫烈日勞勞午稼穡難築場忙後先輸官歸
來檢點釜中粟補苴今年仍不足

蠶桑難采桑女伴身苦寒紡織勤鳴機裂下歸賈人賈
人端居坐華屋纖指不動曳羅縠

樹藝

藝麻行

梅庚

雙溪野磧人栽麻女績男耕無怨嗟自鑿昆明習組練
府帖傳來急如箭沿江設局修舳艫黃麻干捆軍前需
朝廷軍需聞給價但願當官免笞罵明年麻地將種蒿
蒿深吏索人能逃

吳趨
吟種花

邵長蘅

山塘映清溪人家種花樹清溪鴨頭青門前虎邱路春
陽二月中雜花千萬叢朝賣一叢紫夕賣一叢紅百花
百種態牡丹大嬌貴一株百朶花十千甫能賣朱門買
花還四面護紅闌繡幕遮風日嬌歌間清彈復有些子
景元人呼盆景
爲此子景點綴白石盆咫尺邱壑趣屈蟠松檜根
買置几案間一盆直十鑲老圃解種花老農解種穀種
穀輸官租種花艷儂目種花食肉糜種穀食糠粃還復
受敲扑剗肉難爲醫嗟呀重嗟呀老農苦奈何呼兒賣
黃犢明年學種花

新茶行

宮鴻厯

六安山中種茶客來宿平塘主人宅我亦肩輿憩此間
土牀相近蓬窗隔客子喃喃語僕夫今年寒土春不蘇
六安山中雪一尺黃金如土茶如珠進茶例限四月一
三月寒猶刺人骨旗槍未向雪中生檄符已自州城出
何處南枝長粟芽持金轉買向隣家往年一樹一金值
今年三倍輸官茶儂家有茶十六樹里正來科種茶戶
慳囊撲滿三百文沽酒殺雞完旦暮明朝賣女與商人
七尺銀鐙始脫身官火乾焙局秤大折耗錢增二十緡
幕司齎送到銀臺蠟裏筠籠當面開通進堂官凡幾輩

樣茶一封呈來可憐進茶未十日春雷一聲萌葉出
換鹽換米不值錢只今販向金板驛我聞此語重悽然
靈薺如今合棄捐但知捫乳和酥煮誰解分泉沃雪煎
中朝又說武夷好陽羨基盤賤如草頭網入庫飽蟬蟲
枉用僉名書進表

采茶歌

陳章

鳳篁嶺頭春露香青裙女兒指爪長度澗穿雲采茶去
日午歸來不滿筐催貢文移下官府那管山寒芽未吐
焙成粒粒比蓮心誰知儂比蓮心苦

蓬草篇

余自蘭州循中衛同甯接府檄委勘香山
雹災山在衛城南八十里而至災所幾百

里程跋涉大蹟至彼出錢易粟芻不得訪之則
居民山中故食蓬草也持示余有沙蓬水蓬綿
蓬三種食之之法入水一沸漉出之別入水熟
以爲羹充日夕饔飧之具多則乾以禦冬余乃
知邊塞間窮民竟有啖草以爲生者命烹以進
腥漚幾不能下咽而邊民終年食此可歎也按
蓬即蒿類見於毛詩爾雅諸書蒿類如莧葍邪
蒿味甘氣香可以供蔬然非常食又如博物志
所載一種蓬草子作飯無異稗米今山民所茹
者皆根葉未聞有子如杭米者非美種也余目
擊感愴以爲雨露天之常珍而茹草人之奇厄
因詠是篇以補風土志乘之缺并以告其縣令
俾加賑焉

周錫溥

金城歸來寒始退凌晨飛騎至中衛衛東半壁繞邊牆
香山卻出邊牆背炎風五月雹如雷捧檄行勘香山災
路窮巖斷百里許始見屋角烘烟煤居民迎謁舞相屬

我僕已痛車卸軸呼令喚米充一餐山中食草不食粟
夜深月黑人奔波太息奈此官供何口道草名手摩抄
逡巡余側那忍訶一種頭垂如羽葆名曰沙蓬出沙杪
一種微窪谷下苗厥名水蓬類萋蒿別有綿蓬葉瓜碧
入夏軟現兜羅色青褻小婦淪殘冰三種齊烹待官擇
土氣苦腥味苦澀舌本艱強嚼不得推案置之長太息
問民啖此經幾秋豈無五種田可糴民言甯夏河爲塞
此山巉嶮懸河外禹時棄地秦時壕偶有人民雜魑魅
枯暑戰霜陰氣涸重霾輒露陽施閉舍南老翁面凍皴
知春不知楊柳穠病思清井澆肺渴雪盡卻飲沙中泥

先時父祖營耕鑿萬畝斷山山脈動短苗初茁冰花開
又報沙蟲大如蛹官籽委棄如土苴子孫啖草爲生涯
草少人多日一啜飢腸宛轉鳴縑車昨尋薦地西山麓
牧放牛羊盼年熟肉可充食皮可衣贏得餘資作糗粥
霜災瞥過旋成空牧場死骨撐青紅老鴉惡鴟飽狼藉
玉更往往啼腥風東家西家淚沾灑回看蓬草嗟獨在
謝天再拜乞天慈但願歲蕤得長採我聞此語感且吁
大哉天地何事無記我南中歲無恙廩困遮迤如屏障
市橋豚酒滿眼酤老饕未饜猶惆悵自從作吏來邊關
邊黎照眼飢羸瘵每聞流亡夜輾轉忍竭膏血營炮燔

豈知香山近咫尺性命乃有懸草管人生九土共覆載
不著食籍良可歎行告爾主發陳廩漏澤一線回天慳
語闕攜槩疏所記客次蕭颺北風厲莫怪我詩多苦聲
請官嘗此三蓬蘽

花兒匠

汪如洋

紅塵多少看花客說到栽花苦無策匠人家世住豐臺
能使花紅復能白紅紅白白千萬叢巧奪造化回天工
擔向朱門索高價歸來蓬戶猶春風朱門看花朝復暮
看取花新忘花故殘枝剩蕊飽霜露罨盡牆陰不知數
擢之使活接使附盡是匠人衣食具吁嗟乎匠心日巧

花日新花朶自新根自陳賺盡世上看花人。君不見蓬戶忽富朱門貧。

種柳行

張問安

二月農民事農畝官府下來催種柳吏持白挺橫驅民民來稍遲吏怒嗔八口辛勤仗牛力欲避鞭笞惜不得柯條露載千車馳牛行不前民涕垂種柳年年竟成例柳苦難爲一歲計塗朱置堡空無人夜寒守望還需民豪猾連雲近城住公然晝伐道旁樹村童拾屑供厨煙奪還還詐童父錢民業拋荒吏蹂躪禿柳無枝官不問吁嗟乎安得一官常十年坐看柳色青到天

漚麻歌

江右以種麻爲業漚於溪者旦暮不絕感而賦此

沈毓蓀

朝漚麻暮漚麻陂塘水清淩縷縷迎風斜漚罷張機深夜織一梭兩織無停息換米前街杼柚空身無完衣淚沾臆君不見朱門嬌女羅紈鮮日日池頭看采蓮

蘆柴行

陸炳

一蘆值一錢無錢斷炊煙蘆灘千萬頃樵夫不息肩樵夫固自苦無錢竟誰憐君不見蓬頭婦女走江邊拾柴爭似拾金鈿

采葛行

永之祁陽土瘠田少惟葛布名于天下永俗女任力作雖士族亦朝采夜績貧者多

以葛給其家爲作采葛行

毛國翰

初陽葛蔓山險阻上山采葛邨中女朝畏長蛇暮畏虎
山風吹鬢飛秋蓬歸來治葛不言苦終朝采葛露霑裳
終夜辟纊不盈筐機聲軋軋日色赤百絲千縷未成尺
和人地瘠山田少高田種麥低田稻去歲小旱禾半枯
妻號兒啼不得飽織葛一幅值二千斗米五百青銅錢
貧人生計殊可憐江南富女厭梁肉樓上當風曳羅縠

吳趨
吟 賣花家

孫源湘

前花後花中非花五色璀璨如朝霞入門花光看不定
鶯語玲瓏花外聽天家花事祇一春儂家花事四季新
雪蕉疑懸摩詰畫翦綵訝出隋宮人先期爲珍後期寶

開在當時轉如草卽將人面比桃花多見何如偶見好
宣州白盃一種妍紅箋書價值十千朱門買花爭早得
罕物不惜黃金錢種花種百木衣食自然生計穩種穀
種一年剗肉補剗租不全種花人家肥種穀人家飢明
年傭作種花家手隄花籃去賣花一籃花值金一兩妓
館遊船還倍賞

華筍行

華州民種竹而不鬻筍長刀巨挺邏守甚嚴竊之者深夜入林中往往爲守者所殺

而官厨重此味尚有忘驅命以射
可者余過華州感其事因作是詩吳振棫

華人護筍不鬻錢欲養竹竿青上天貴人朶頤輒來乞
官募貧兒使偷掘風號月黑匍匐往二寸尖尖柔玉長

滿攜懷袖歸大笑明日獻官官有賞禍機一發身被創
生者幸矣死莫償孤兒寡婦自啼哭筵上但誇春笋香
往時應募人廿四近亦貪生數辭避只愁高宴急徵求
地凍雷遲苦難致吁嗟賞盜盜乃多饒舌殺人將奈何
吾儕作吏那免俗曷不飽食花豬肉

拾蘆根

郭儀霄

豪家蘆葦刈如山貧家兒女拾蘆根蘆根如刀血盈指
拔得蘆根淚如泚飢腹俵俵炊無米沙頭晒日面如鬼
君不見官舟峩峩駭鳬驚大酒肥羊馬頭住

賣花船

郝談

賣花市上開園看賣花街上隄籃喚還須他方去賣花
芬芳壓載船爲家嬌紅豔紫艫中有一船停處人爭取
昨見河干賣花人是我鄰居農出身我欲詢其故彼先
向我訴昔日田荒戶逃亡自鬻身於虎邱之山塘主人
本以花爲業因而學得種花法全家安樂衆香國生涯
四季利倍得遊船妓館尤得利畧無計較銷銖意至今
衣食頗饒足年年耕種無荒熟除是在家卽在船千樹
萬樹花值錢有錢人不論貴賤堪歎從前學種田言訖
一笑開船去未知此去又何處

花兒市

張祥河

花兒市中多市花市花五色人前誇人來買花價不賒
製花有匠極工巧枝葉紛拏出春爪一飯花中儘堪飽
擔花早起上長街千純錦繡街頭排護花高懸鳳字牌
富家生女稱國色一花三日插不得貧家無米愁炊烟
女兒買花不惜錢

采豆行

凶歲後村人乏食今年多種黃豆煮食者皆黃瘦余憫之

康曾城

朝出采豆完持歸煮作糜今年米價甚昂貴此豆雖少
能療飢釜中豆泣婦亦泣三日未炊鍋漏汁傾豆塗甃
粗補完再藝新條釜邊立分羹那足饜腸腑收汝眼中
淚如雨試出門前望高處幾處炊煙出鄰戶

燕臺
樂府花局子

梁紹王

李桃應候開無差烘而出之名唐花先時者珍後時寶
開在當時轉如草挽回造化信有之斲削元氣良由斯
同根相煎何太急阿奴火攻出下策不須煎綵方隋宮
不須羯鼓搗春風頃刻千紅兼萬紫雲羅霞錦開重重
京師女兒美如玉最妙芳齡十五六眼波秋水黛春山
灼灼花枝鮮耀目頗聞羅帳夜橫陳煖炕熏籠熨體頻
人亦如花嬌養法蕊珠烘透十分春容顏轉眼渾非舊
玉骨香桃可憐瘦自是英華早發舒面痕容易觀河皺
矧茲弱植力無多雨妬風欺可奈何縱有十重金步障

難留隔歲玉枝柯。世人看花惜花少。花若有知花亦惱。
不若移根冷處栽。自開自落年年好。豈知好景發年年。
爭得非時競逞妍。若使名花都有壽。何人肯費買春錢。

采茶行

閩媛吳蘭

山家女兒鬢盤鴉。雨前雨後采新茶。澗水齏淪渾似鏡。
淩波照見顏如花。采不盈筐長歎息。三春辛苦向誰說。
擔向侯門不值錢。一甌春雪千山葉。

田家補

田父詞

毛師柱

老農生長婁江邊。自言力作思逢年。那知年豐更愁苦。

令我不得中宵眠箱中有粟囊無錢公庭敲骨真可憐
傾箱不足了官稅依然土銼無炊煙烏庠人生筋力百
可用慎莫歸種江南田

犁田曲

蔣炯

削木爲軌橫牛脊駕以長犁約三尺麻繩雙絡垂牛腰
歷高水淺行易勞駕牛老翁頭盡白叱牛揚鞭雙踝赤
牛行在前翁在後人牛齊心復齊力雨犁水田土易勻
旱犁阪田多苦辛牛毛半脫牛尾掉驅牛不行翁怒噴
歸來解牛放道左大牛嬉遊小牛臥年年犁田無盡時
問翁那不鬢成絲

田家刈稻辭

褚逢椿

催租迫重九田家無逸人腰鑱晃白日平波臥千莖雞
雛聚握粟雀至相喧爭所欣小兒女五尺能負薪種麥
須及雨刈稻須天晴願言有遺秉庶以報力耕先期輸
官稅追呼免吏嗔